

րահարի գերեզման» եւ պատմեց մի հին աւանդութիւն, որպէս թէ, մի տղայ եւ մի աղջիկ միմեանց շատ սիրելիս են եղել. հայրը չէ ուզեցել իւր աղջկան տղային տալ. նրանք միաբանուում են, եւ տղան մի գիշեր փախցնում է իր սիրուհին: Հայրն իմանում է, աղջկայ ետնէն է ընկնում, եւ այս ծորի մէջ բռնելով առանց մի խօսք ասելու իր խենջարը խրում է նրա սիրտը եւ սպանում է: Տղան այս տեսնելով, չէ կարողանում համբերել իր կսկիծին, եւ մի ժայռի գլխից իրան վայր է գցում եւ մեռնում է: – Մարօս ցոյց տոեց բարձր ժայռը, որի մօտ նոյնպէս կուտակուած էին մանր քարերի կտորտանք: – Աղջկան թաղում են այնտեղ, ուր թափոել էր նրա արիւնը, իսկ տղային այնտեղ, ուր ընկած էր նա ժայռից: Այն օրից նզովք էր դրոել, որ ամէն մի ճանապարհորդ, այնտեղից անցնելով, մի քար գցում է նրանց գերեզմանի վրայ, ի նշան այն նախատիւնքին, որով այն աղջիկը մրոտեց իր հօր եւ մօր անունը:

– Դու էլ այն աղջկան վա՞տ ես համարում, որ քարկոծում ես խեղճի գերեզմանը, – հարցրի ես:

– Մէկ աղջիկ, որ ուրիշ տղայի ետնէն է ընկնում, այդ վատ չէ՞ – հարցրեց նա պինդ ձայնով:

– Ապա ի՞նչ պետք է անէ, երբ սիրում է տղային: Սիրելն ինչով է վատ:

Նա սկսեց ծիծաղել, որպէս թէ լսում էր ինձանից մի յիմար խօսք:

– Աղջիկն ինչպէ՞ս կարող է սիրել տղային, երբ հերն ու մերը ատում են: Հա՛ թող սիրէ, այդ ոչինչ, նրա կամքով խօ չէ՞, որ օտարի տղայի ետեւից թրել է գալիս: Ամօթ չէ՞:

Ես ուզեցի հերքել նրա ասածը, բայց նա իմ խօսքը կտրեց, եւ մի կծու խոժոռմունք գործելով իւր գեղեցիկ երեսի վրայ, ասաց.

– Է՛հ, դատարկ բաներ մի՛ խօսի, գլուխս տանում ես...:

Նա վազեց առաջ:

Ճանապարհը Մարոյի համար սովորական լինելով, չէր զգում նրա երկարութիւնը: Ես համարեա թէ յոգնեցայ: Բարձրանալով բլուրի գագաթին, նա կանչեց.

– Դիբօ՛, Դիբօ՛:

Նրա զիլ եւ ձգական ձայնը արծաթէ հնչիւններով տարածոեցաւ հեռու սարերի մէջ:

Հանդիպակած բլուրի ետեւից յայտնոեցան մի քանի փոքրիկ կերպարանքներ, որոնք թռչկոտելով եւ ճիչ բարձրացնելով, վազեցին Մարօի առաջ: Դրանք երեք կիսամերկ աղջիկներ էին, այնտեղ արածացնում էին Կ. գիւղի